

【去看阿公阿婆】胡明華原作

愛轉去看阿公阿婆咧，歸家人都當暢。前一暗晡阿爸阿姆緊吩咐阿立韶朝晨愛早早跣，做毋得忍床。因為阿公、阿婆戴在山林壁壠角，阿立一家人愛盤兩到火車，再過行十過分鐘正會到，係講忒晝正出發，連食夜都可能會赴毋著。

阿立當好跣阿公去屋脊个樹林捉蟲仔搞，書肚有教个蟲仔，差毋多逐項都尋得著。弄毛蟲、草蜢、剪刀鉸、蝶仔、囊蜆仔、花菇仔，想愛尋就毋驚尋無。

阿婆當惜阿立，見擺阿立轉來，佢斯會跲工打菜粿分這個心肝仔食，菜粿就係佢兩子阿婆个祕密。阿婆毋知哪來个本等，總係揣得著這個心肝孫仔好麼个玩具，兩儕總會聘好，下二擺阿婆愛送阿立麼个好搞个東西，阿立就恁樣望等兩子阿婆再過見面。

無想著，阿立這擺轉去，正知阿公前一駁仔行路無細義路斷腳骨，這下愛怙棍仔正做得停動，連行都毋方便咧。阿婆乜手著傷，歸隻手包等藥膏，莫講落灶下打菜粿，連自家食東西都有困難。

阿公阿婆無法度陪等搞咧，阿立試著當失望，一路翻山過嶺來尋阿公、阿婆搞，結果嘎變恁樣。佢儘採問¹過人以後，斯面臭臭仔因落間房，毋聲毋氣闊捩捩仔，佢越想越毋甘願。

臨暗仔个時節，阿爸、阿姆攞阿立喊出間房，旨等阿立開嘴，阿爸塞分佢一隻袋仔，阿立打開來看，裡背係佢想愛當久个變形金剛，這擺做得展寶分同學看咧。

「你知這係阿婆手著傷以後，跲工下山去買分你个無？」阿姆講。「吓？」阿立著下驚，想著自家毋掏²阿婆个態度，試著當見笑。

續下來阿爸又拿出一隻畜蟲仔用个盒仔，裡肚還有一隻雞油姑。阿立看著面紅濟炸還較敗勢，頭犁犁仔細細聲問：「係阿公抑係阿婆買个？」阿爸講：「若婆買个盒仔，若公自家捉个雞油姑！」

阿立越想越試著不應該，佢想著阿公阿婆恁惜自家，著傷咧還想著愛準備東西分佢。顛倒係佢，就知顧自家，完全無想著阿公、阿婆著傷咧有幾艱苦。佢這下分醒咧，決定無愛做一隻毋知人我个細姪仔，等下就去攞阿公、阿婆會失禮，順續使妮一下，佢想：「麼人喊阿公阿婆恁惜佢呢！」

¹ 問：音 munˊ；此指對人打招呼。

² 毋掏：音 m fenˋ；不去搭理。

【自由】李淑娟原作

自由，係一種力量，一種夢想，一生人个追求，因為自由做得帶來快樂。頭擺到這下幾多人為著自由打拚，斯算付出錢銀、犧牲生命乜毋驚。佢姆就係一個「無自由，甘願死」个人！

佢屋下附近个傳統市場安到「自由市場」，臨暗頭開始做生意。時間一到，市場裡背一蕊一蕊黃黃光光个電球陸陸續續點著，攤仔个商品一項一項排出，市場像目陰目陽个巨人，一息一息散氣返魂。跔等佢展現生命力量，附近个伯姆叔婆、阿姨、阿姑做下出動咧，連外勞乜遽遽撻等中風个老阿婆參加這逐日舉辦个「拍賣會」，這就係「自由」个魔力。

佢姆係一個小學先生，學生仔放學過後，囤一日个壓力，就愛「自由」一下去市場買東西，為臺灣个經濟做貢獻。佢這個孝子，輒常愛陪阿姆去遠市場順續搵東西，三不二時還愛試食點評，安腦阿姆買東西个心得：這家个鹹豬肉毋會死鹹、該家个焙煙腸毋會忒肥、前排賣个魚仔較姜、後背个愛玉係佢最好食个……。跔等交關過个攤仔緊行緊多，阿姆个皮包仔緊來緊扁，佢手町个油紙袋乜緊來緊重。

「自由」个商品百百種，做得講係「麼个都有，麼个都賣，麼个都無奇怪」。阿姆毋單淨在這買各種食材摺衫褲鞋襪，連遮仔、被骨、錢頭、電扇這兜分佢想毋解个生活用品乜會買。有一年八月半，家家屋屋愛焙肉，市場肚尖到就像接年活動，逐个人使錢像背銃仔相戰。阿姆滿面紅光，看起來比相打雞還較有精神，佢摺手町个袋仔交分佢過後，就單人獨馬舂入前線，等佢再過舂出來个時節，當風神个拿等佢个戰利品——奔馬桶个蓋仔。

「金錢當珍貴，生命價值高，若係為自由，麼个都無愛。」雖然佢姆逐擺去自由市場買東西，總係拿出當潑辣又毋驚死个精神來消費，其實佢知佢全係為著屋下大細，屋下麼人好食麼个，好淋麼个，麼人好著仰般个衫褲，需要麼个東西……，佢全記在心肝肚，毋識毋記得。

阿姆在「自由」裡肚買屋下人个需要，在「自由」裡肚準備屋下个溫暖。阿姆追求个「自由」，牽連等屋下人个幸福。